

摛藻堂四庫全書薈要

集部

欽定四庫全書
會要卷一萬三千七百二十九

集部

毘陵集卷十三

唐 獨孤及 撰

集序 三首

檢校尚書吏部員外郎趙郡李公中集序

唐故左補闕安定皇甫公集序

唐故殿中侍御史贈考功郎中蕭府君文章

集錄序

讚 六首

蘇州刺史兼御史大夫襄武李公寫真圖讚

尚書右丞徐公寫真圖讚 并序

楊起居畫古松樹讚

張侍御寫真圖讚

佛頂尊勝陀羅尼幢讚

并序

觀世音菩薩等身繡像讚 并序

集序

檢校尚書吏部員外郎趙郡李公中集序

志非言不形言非文不彰是三者相為用亦猶涉川者假舟楫而後濟自典謨缺雅頌寢世道凌夷文亦下衰故作者往往先文字後比興其風流蕩而不返乃至有飾其辭而遺其意者則潤色愈工其實愈喪及其大壞也儻偶章句使枝對葉比以八病四聲為枯拳拳拳守之如奉法令聞臯繇史克之作則呷然笑之天下雷同風驅雲趨文不足言言不足志亦猶木蘭為舟翠羽為楫翫之於陸而無

涉川之用痛乎流俗之惑人也舊矣帝唐以文德專祐於下民被王風俗稍丕變至則天太后時陳子昂以雅易鄭圓者浸而嚮方天寶中公與蘭陵蕭茂挺長樂賈幼幾勃焉復起振中古之風以弘文德公之作本乎王道大抵以五經為泉源抒情性以託諷然後有歌詠美教化獻箴諫然後有賦頌懸權衡以辨天下公是然後有論議至若記叙編錄銘碑刻石之作必採其行事以正褒貶非夫子之旨不書故風雅之指歸刑政之本根忠孝之大倫皆見於

詞於是文士馳騁飈扇波委二十年間學者稍厭折揚皇
夸而窺咸池之音者什五六識者謂之文章中興公實啟
之公名華字遐叔趙郡人安邑令府君第三子質直而和
純固而明曠達而有節中行而能斷孝敬忠廉根於天機
執親之喪哀達神明其任職釐績外若坦蕩而內持正性
諫不犯顏見義乃勇舉善惟懼不及務去惡如復讎與朋
友交然諾著於天下其偉詞麗藻則和氣之餘也學博
而識有餘才多而體愈迅每述作筆鋒風生聽者耳駭

開元二十三年舉進士天寶二年舉博學宏詞皆為科
首由南和尉權秘書省校書郎八年歷伊闢尉當斯時
唐興百三十餘年天下一家朝廷尚文夫羿工乎中微
拙於使人無已譽公才與時并故不近名而名彰時輩
歸望如鱗羽之於虬鸞也十一年拜監察御史會權臣
竊柄貪猾當路公入司方書出按二千石持斧所嚮郡
邑為肅為姦黨所嫉不容於御史府除右補闕祿山
之難方命圮族者蔽天聰明勇者不得奮明者不得

謀公危行正詞獻納以誠累陳誅充渠完封疆之策閻
犬迎吠故書留不下時繼太夫人在鄴初潼關敗書聞
或勸公走蜀詣行在所公曰奈方寸何不若間行問安
否然後輦母安輿而逃謀未果為盜所獲二京既復坐
謫杭州司功叅軍太夫人棄敬養公自傷悼以事君故
踐危亂而不能安親既受汚非其疾而貽親之憂及隨
牒願終養而遭天不弔由是銜罔極之痛者三故雖除
喪抱終身之戚焉謂志已虧息陳力之願焉因屏居江

南省躬遺名誓心自絕無何詔復授左補闕又加尚書
司封員外郎璽書連徵公卿已下傾首延佇至止之日
將以司言處公公曰焉有隳節辱志者可以荷君之寵乎
遂移疾請告故相國梁公峴之領選江南也表為從事加
檢校吏部郎中明年遇風痺徙家於楚州疾痼貧甚課子
弟力農圃贍衣食雅好修無生法以冥寂歷思慮視爵
祿形骸與遺土同惟吳楚之士君子譏家傳修墓版及
郡邑頌賢守宰功德者靡不賣貨幣越江湖求文於公

得請者以為子孫榮公遇勝日時復綴錄以應其求過是
而往不復著書少時所著者多散落人間名存而篇亡
自監察御史已後所作頌賦詩歌碑表敘論誌記贊祭
凡一百四十三篇公長子羔字宗緒編為二十卷號中
集其中陳王業則無疆頌主文而謫諫則言鑿含元殿
賦敦禮教則哀節婦賦靈武二孝讚表賢達盛德則崔
賓客集序元魯山碣房太尉德政碑平原張公頌梁國
李公傳德先生誄權著作墓誌李夫人傳盧夫人頌一

死一生之間抒其文情則祭蕭功曹劉評事張評事文吟詠情性達於事變則詠古詩思舊則三賢論辨卿大夫之族姓則盧監察神道碑思自叙則別相里造范倫序誣佛教心要而合其異同則南泉真禪師左溪朗禪師碑其餘雖波瀾萬變而未始不根於典謨故覽公之文知公之質不俟覲容貌聽詞氣假令束帶立於史臣之位足以潤色王度天而病之時不幸歟公之病也嘗以斯文見託詔某書曰桓譚論揚雄當有身後名華亦

謂足下一桓譚也及於公才宜播其述作之美明於後人故拜命之辱而不讓今著其文德冠于篇首焉

唐故左補闕安定皇甫公集序

五言詩之源生於國風廣於離騷著於李蘇盛於曹劉其所自遠矣當漢魏之間雖已朴散為器作者猶質有餘而文不足以今揆昔則有朱絃疎越太羹遺味之嘆歷千餘歲至沈詹事宋考功始財成六律彰施五色使言之而中倫歌之而成聲緣情綺靡之功至是乃備雖

去雅浸遠其麗有過於古者亦猶路鼗出於土鼓篆籀
生於鳥跡也沈宋既歿而崔司勲顥王右丞維復崛起
於開元天寶之間得其門而入者當代不過數人補闕
其一人也補闕諱冉字茂政玄晏先生之後銀青光祿
大夫澤州刺史諱敬德之曾孫朝散大夫饒州樂平縣
令諱介之孫中散大夫潭州刺史諱頴之子十歲能屬
文十五歲而老成右丞相曲江張公深所歎異謂清穎秀
拔有江徐之風伯父祕書少監彬尤器之自是令問休暢

舉進士第一歷無錫縣尉左金吾兵曹今相國太原公
之推轂河南也辟為書記大厯二年遷左拾遺轉右補
闕奉使江表因省家至丹陽朝廷虛三署郎位以待君
之復不幸短命年方五十四而歿嗚呼惜哉君忠恕廉
恪居官可紀孝友恭讓自內形外言必依仁交不苟合
得喪喜慍罕見於容故覩君述作知君所尚以景命不
永斯文未臻其極也蓋存於遺札者凡三百五十篇
其詩大畧以古之比興就今之聲律涵詠風騷憲章顏

謝至若麗曲感動逸思奔發則天機獨得非師資所贊
每舞雩詠歸或金谷文會曲水脩禊南浦愴別新意秀
句輒加於常時一等才鍾於情故也君母弟殿中侍御
史曾字孝常與君同稟學詩之訓君有誨誘之助焉既
而麗藻競爽盛名相亞同乎聲者方之景陽孟陽孝
常既除喪懼遺製之墜於地也以及與茂政前後為諫
官故銜痛編次以論譏見託遂著其始終以冠於篇

唐故殿中侍御史贈考功郎中蕭府君文章集

錄序

足志者言足言者文情動於中而形於聲文之微也槩
於歌頌暢於事業文之著也君子脩其詞立其誠生以比興
弘道歿以述作垂裕此之謂不朽侍御諱立南蘭陵人
也御史中丞汝州刺史府君之仲子奕世純嘏及公始
大襁褓克歧十五而立神靜氣和才與道并孝悌忠信
以為已任行有餘力故幼而學文嘗謂揚馬言大而迂屈
宋詞侈而怨沿其流者或文質交喪雅鄭相奪盍為之

中道乎故夫子之文章深其致婉其旨直而不野麗而不艷天寶元年詔徵賢良方正以備多士公時年十七射策甲科盛名翕然震誼京邑論者知遠大之跡自此始也既而在幕宦途遭遇世故歷佐戎幕周旋江海攸徂之邦必聞其政嘉謨成績歲在諸侯之策既言中選倫亦動與古會由是自廷尉評拜監察御史轉殿中侍御史觀其逐逐利往冥冥翰飛方將乘驚風以騁鶩視青雲如咫尺天道何善而無報與其才而不與其壽成

其器而不成其志命矣夫斯才也而有斯年也公之元兄尚書庫部員外郎兼侍御史曰某與公俱以文學政事為臺閣領袖丹穴之雙鳳繞舉棠棣之一花先落天倫之慟可勝既耶以公瑰姿瑋度利器淑德與東流皆逝今則已矣可以藏遺芳以示後嗣者其惟夙昔麗藻平生翰墨乎於是茹痛開緘收血散帙緝其遺札得詩賦贊論表啓序頌銘誄誌記凡若干篇編為五卷以為集錄庶幾弔賈生者省鵬集之日問相如者知禪草猶

存云爾

讚六首

蘓州刺史兼御史大夫襄武李公寫真圖讚

作績精至於藝懸解擬公之德容與化同製獨立正色
神和氣邁婉兮清揚若聞嘉話公綽不欲仲山匪解形
乎懿範觀者目駭百城仰止羣吏儆戒成務安民亦猶
此畫

尚書右丞徐公寫真圖讚并序

侍御史韓公至清以學藝書畫之美聞於天下辛丑歲
三月以王事靡盬館於豫章與前尚書右丞徐公同舍
於慧命寺之淨室嘗以暇日裂素灑翰寫畫徐公之容
陳於公之坐隅而美目方口和氣秀骨毫釐無差若分
形於鏡入自外者或欲擊跼曲拳俯僂拜謁不知其畫也
衆君子嗟嘆之不足則言以贊其美及亦繼唱於後讚曰
哲匠運思天姿是具假之筆精實以神遇居然成像豁
若披霧瞻仰神鋒如窺武庫婉婉高識昂昂獨步絕頂

孤松空陂白鷺不犯之色匪躬之故孰知造化亦在毫素

楊起居畫古松樹讚

道在毫末神凝意注闔然物生千歲古樹龍盤屈精
魅固護霜封雪埋翠幄如故宜構大厦胡為中路豈猶
有待公輸之顧落落貞姿傳之繪素

張侍御寫真圖讚

堂堂乎張洵美且恭執法樹下分形畫工玉立天姿霜

淬神鋒武庫森戟寒山勁松方彈解豸以佐夔龍他年

雲臺與古同風

佛頂尊勝陀羅尼幢讚并序

道無形相心離文字非言無以導引故諸法生於假名
非智無以調伏故大音傳於密教茫茫五濁客塵覆之
根識相緣生滅相隨世未有為之牢獄二乘求惠而著
空十地見性而弗了微我智印侯誰司南敦如來以大
悲自定之惠力示總持無畏之秘藏雲覆世界雷震羣

有淨除我垢令人法性設字根本假文以筌意也足聲
齒舌因音以見法也以十四音攝一切智雖入無漏而不捨有為即色以證空也奉之者惡趣固可使開閉黑業必為之清淨况勝緣乎初太保韓國苗公以兩朝秉鈞所積廩賜顧命宗子家老曰喪祭之餘以庇功德於是我想國潁川公將演成公弘誓之果也是以樹因此幢韓公生代天工德本植焉歿無鬼責惠芽滋焉而潁川公猶興哀於絕絃之地將乞靈於無我之法度俾法

雨雨公身田故琢貞石以刊微言仰之贊之如揭日月烏
戲墨點之界有極鐵圍之山有壞惟梵音與法印等空
虛而無窮則公之前際疇可弘度其辭曰

六趣輪轉根塵相刃死生變化如響如瞬何用拯溺摠
持秘印道罔不在弘之者人乃經靈幢公之了因讚持
大力啟廸速津天魔遁形地獄開門拔箭解縛如日破
昏韓公善根與石長存

觀世音菩薩等身繡像讚并序

元年建寅月前相州安陽縣令何昌系以是月甲子當受生之辰痛欲報而罔極哀見在之無住顧非大雄之慈法雲之悲則莫能救拯我無明苦果敷祐我弘誓願力乃彰施五色以刺繡成文寫菩薩之真相等觀音之全身於是平諦觀眸容瞻仰聖位知海潮之梵音不遠蓮花之法座可識將令功德池水溉灌其三業菩提根芽發生於一雨至哉安陽之樹善也弘矣欲廣其善利以偈讚云

法雲垂蔭光破黑業五眼周視四魔怖惱以色觀空於
相見法永殖慈緣恒沙億劫

毘陵集卷十三

謹案卷十一第二頁後三行為文章著龜原本著
訖者今改

第四頁前五行尉清苑原本苑訖苑今改

第九頁前八行京師人傳寫策藁原本京訖涼今
改

第十四頁前一行不曰智乎原本曰訖可今改

卷十二第七頁前四行五行以公前後課績條奏

原本績訖積今改

卷十三第三頁前一行折揚皇孝原本孝記華據

莊子改

第八頁後六行亦動與古會原本古訛吉今改



總校官庶吉士

臣

侍

朝

校對官檢討

臣

盧

應

謄錄監生

臣

徐

松

欽定四庫全書叢要

集部

毘陵集卷十六

四至六



詳校官助教臣常循

欽定四庫全書
叢要卷一萬三千七百二十九

集部

毘陵集卷十四

唐 獨孤及 撰

序上 二十二首

送張徵君寅遊江南序

送李白之曹南序

送張處士申還舊居序

宋州送姚曠之江東劉冉之河北序

送張泳赴舉入闈序

送史處士歸滏陽別業序

送開封李少府勉自江南還赴京序

送陳留張少府鄆東都赴選序

送弟惲之京序

送韋評事赴河南召募畢還京序

奉送元城主簿兄赴任序

送廣陵許戶曹充召募判官赴淮南序

仲春裴胄先宅宴集聯句賦詩序

并詩

鄭縣劉少府兄宅月夜登臺宴集序

華山黃神谷醮臨汝裴明府序

按圖經仙人黃廬子得道昇仙之所

建丑月十五日虎丘山夜宴序

冬夜裴員外薛侍御置酒宴集序

并詩

送宇文協律赴江西序

送賀若員外巡按畢歸朝序

送長洲劉少府貶南巴使牒留洪州序

送王判官赴福州序

送薛處士業遊廬山序

序

送張徵君寅遊江南序

初貞元二年進賢星明於是夫子與廣陵馬曾俱以立
纁辟焉一命而俯受服赤墀之下子甘節不奪歸耕南
陽議者稱馬之利用陋子之獨善及以為不然君子之
道舒之則雲蒸雨降以救大旱卷之則天倪道機不盈

一握姑務忠信以安聖時則歌國風於畎畝是亦為政
有民人焉有社稷焉何必薄遊然後稱德至是夏六月
以菰菜之興扁舟而東是行也與夫乘桴揚舲者不同
日矣津樓直望江漢在目少別非志士所悲深衷豈短
章能見桃源秋至僕當寥其仙實俟子於武陵之南溪

送李白之曹南序

曩子之入秦也上方覽子虛之賦喜相如同時由是朝
詣公車夕揮宸翰一旦樞被金馬蓬累而行出入燕宋

與白雲為伍然則適來時行也適去時止也彼碌碌者
徒見三河之遊倦百鎰之金盡乃議子於得失虧成之
間曾不知才全者無虧成志全者無得失進與退於道
德乎何有是日也出車桐門將駕于曹仙藥滿囊道書
盈篋異乎莊舄之辭越仲尼之去魯矣送子何所平臺
之隅短歌薄酒擊筑相和大丈夫各乘風波未始有極
哀樂且不足累上士之心况小別乎請偕賦詩以見交
態

送張處士申還舊居序

海水不揚波久矣故昆蟲草木得遂本性夔益巢許各安其節天鍾靜於子而博之以文大壑無底虛舟任觸世皆尚白獨守太玄顧流俗而不言退將脩乎初服吾於是見全人之操矣乃知白雲上下蓋無心自出黃鶴飛去當有時而來他年孤舟冀再會於五湖之口

宋州送姚曠之江東劉冉之河北序

春葉尉吳興姚曠至自洛陽中山劉冉至自長安俱以

文博我相與交歡於睢渙之涘始則開青天豁其雲霧亦既窺武庫見其矛戟凡旬有五日而姚適吳劉濟河余歸梁各有四方之事將為千里之別夏四月抗手於盧門議別故也夫別與會悲樂存乎其中故賢智所不能遣然達者遊世隨變所適靜而與陰同德動而與陽同波異乎金柅之有繫匏瓜之莫食子其行矣別何為者北斗在已南風始來聚臺草長京口水闊何以送遠唯當賦伐木以為仁人之贈

送張詠赴舉入闈序

彼馳騁乎士林者鮮不爭九流之勝負徇三川之聲利而張侯獨以善閉關乃知純白內充天機外朗則塵垢糠粃所不能入癸巳歲六月始以出處之道問仕於余予洒然曰今四表文明八紘同治此志士所當登秀造而取青紫不奮不躍如休明何由是罷琴高臺投竿舊浦單車疋馬是日西上君子以為知幾吾見垂天之雲不復顧北溟矣盍使居者歌吾子乎

送史處士歸滏陽別業序

初史侯至自帝丘僕方釀酒於蔣氏之館揖讓堂下由東階升於是一酌而賓禮舉再酌而交態接三酌而威儀懃懃深衷畢見醉中投分客中忘形吾固知握手難常嘉會可惜其聚也言不浹日而意氣感其散也興未及盡而離憂至則臨觴徒倚孰能不以之黯然窮陰欲臘漳滏水厚班馬連嘶歸雲無色非詩何以見離羣者

之志

送開封李少府勉自江南還赴京序

世或謂邦有道穀或謂全於德者不以徇名降志彼於致命猶數數然孰與李侯兩忘而胞合之張其天機與道出處道長則陳力筮仕績成而退藏於密戰勝江海上然後乘歸流而返舊京乃知凌雲麗天則切玉利器於夫子為鄧林之一葉耳而精微純粹豈中士所能得其門哉然當今堯親九族契敷五教材之美者工將度之子雖忘機機未忘子庸詎知泥蟠沙卧不為雲霄

之鑿枘乎但蘭舟桂楫倏忽鳥逝朔風秋草奈離憂何
緣情者莫近於詩二三子盍詠歌以為贈

送陳留張少府歸東京赴選序

每歲孟春大冢宰懸象魏之法以官民材天下髦士於是乎雲屯詞鋒角立智刃今子投袂而起將鼓行乎其間其於湛盧發硎批郤如玉繁弱在手捨拔則獲者吾惟子之望當知君子廣其業達其道則榮譽貴仕可得而拾孰云嫋嫋秋風悠悠遠道足為志士之感哉雜珮

可以申永懷樽酒可以慰別緒其贈言之分顧謂坐者
志之

送弟惲之京序

蒼龍居玄枵之歲與爾吹埙篪於長安靈臺之下當時
爾方青衿予適紈袴各志小學相期大來其後爾以經
術薦遂觀光於上國予牢落兩河為病所繫星分雨散
十有二載中間慙携手一笑者及今而三耳昨日遊寓
今成疇昔此會綿邈空存夢想豈不欲申橘柚之性詠

和樂之什樂未終也別又繼之然君子脩誠則物應克
己則名彰爾能珪璋特達甲冑忠信致逸足於千里吾
有望焉方務遠圖何嗟少別到秦地有問吾事者為報
江湖閒心

送韋評事赴河南召募畢還京序

自唐蒙司馬相如開牂牁鑿零山於是西南夷君長始
受漢印及國家綏以大道振以長策滇越叩棘世亦皆
為外臣蠶茲六蠻獨抗王旅天子方將開外戶掃絕漠

故授相國衛公鉞俾出作方叔入為吉甫且募如貌之
介士將剪長蛇之速飛由是分命我廷尉評事韋公實
佐其任公以止戈諭之采薇歌之使政有典則人知義
所故燕齊少年韓魏勁卒召募如景附赴敵如焱馳自
春至于是月受命羽檄之下者凡萬八千計然後頒賜
算級將朝于京師夫勤王集事之謂忠周爰諮詢之謂
智復命而不僭于素之謂信姑樹三德載馳六轡行當
以柱下之書讚幕中之畫是役也冥冥羽翰非瞻望所

及矣請偕賦以知魏風

奉送元城主簿兄赴任序

往歲兄之尉匡德刑成禮義舉粃政杜紊綱緝人曰莅民如此其達必大十四年春王正月再命於元城元城地雄人悍土壤賦錯處宋衛中山燕齊趙魏之都會三川輻湊四術轂擊兄方以德舉吏此大邦則千里之迹兆於是矣彼徒勞者其騫翥之濫觴乎歲物已春泰山草綠亦既遷吉駕言徂東豈不知棠棣之詩廢則和樂

之好缺盍使伯氏仲氏偕詠歌之以贈行邁

送廣陵許戶曹充召募判官赴淮南序

冉駹不庭三年矣王師戒嚴將問罪荒服於是上將分職慎選乃僚以許公有持斧舊名斷犀餘地故授以戎政俾發卒於東夫三河之人豪全齊之人武荆吳之人悍藉其餘勇可以盡敵信以致之繄公是賴然則諭王命敦師律度程以料民徵騎以濟衆歌事以遣役輯謀以定功在是行乎高天晚秋殺氣動地靡靡歧路悠悠

旆旌送離如之何賦小戎以為好

仲春裴胄先宅宴集聯句賦詩序

并詩

先是先清明一日右金吾倉曹薛華陳嘉肴醍清酤會
河東裴冀榮陽鄭裒河南獨孤及于署之公堂引滿舉
白自午及子促席于花陰賦詩于月波樂極不醉夜丈
而罷後清明三日二三子春服成思欲脩好尋盟選勝
卜晝裴侯是以再有投轄之會是會也鄭不至吾兄惠
然而來堂有琴庭有篠芳草數步落花滿席中和子冠

烏紗帽相與箕踞嘔嗁傲睨相視稱觴乎其間趣在酒
中判為酩酊之客家本秦也能無嗚嗚之聲其詩云上
天垂光兮熙予以青春今日何日兮共此良辰與君觥
濁醪而籍落英兮知年華之相親蹇淹留以醉止兮孰云
含意而未申歌數闋裴側弁慢罵曰百年懽會鮮於別
離知開口大笑幾日及此日新無已今又成昔不紀而
賦之如春風何其演為連珠以志此會

鄭縣劉少府兄宅月夜登臺宴集序

夏五月小暑至矣吾兄方幕夜天掃月榭有酒如乳醑
我乎城隅城臨近山俯瞰平隰秦郊漢苑相錯如繡且
有穎氣足以娛人故數君子稱觴焉其誰同之有若功
曹龍西李華參軍滎陽鄭洵鄉琊王休河東裴貺鄭尉
京兆韋造皆卿材也聲同而形骸相忘道契故機事不
入是以有高會遠望危言浩歌或心愜清機寓興於物
或語及陳迹盱衡而笑於是初筵而惠好脩中飲而意
氣接既醉而是非遣夫彭澤採菊隱侯臨風謂之盛矣

况高城古臺深夜朗月芳樽良友佳境勝事今夕何夕
八者俱并盍亦偕賦於此乎觀二三子之志

華山黃神谷蘸臨汝裴明府序

按圖經仙人黃盧子得道昇仙

之所

黃盧子滅景上漢千歲矣留碧峯白雲以貽後世故清
機勝事未始有極余吏于華之明年道侶裴冀亦再命
為臨汝令夏六月假道樊邑稅鞅此山思欲追高步詣
真境於是相與攜手及二三友生童子將命者六七人挈

長瓢荷大壺以濁醪素琴會于黃神之谷興也案谷之西頂實三峯東面石壁叢倚東為洞壑乳竇潛泄噴成盤渦兩崖合鬪若與天接二三子將極其登探也至則繫馬山足披蓁石門入自洞口至於梯路蹊連嶂與疊崿度嶧巒而躡凌兢迴緣絕磴及橫嶺而止漂身乎飛泉濯纓乎清漣想夫君俟我於花峯下碧空而嬋娟愛而不見搔首空山然後靡靈草以為席傾流霞而相勸楚歌徐動沂詠亦發清商激於琴韻白雲起於筆鋒是

日也高興盡而世緒遺幽情形而神機王頽然覺形骸
六藏悉為外物天地萬有無非秋毫亦既醉止則皆足
言以志仙跡且旌吾友嘉會之在山也

建丑月十五日虎丘山夜宴序

方今內有夔龍臯禹以佐百揆外有方叔召虎以守四
方江海之人高枕無事則琴壺以宴朋友嘯歌以展霞
月吾黨之職也我是以有今茲虎丘之會巖巖虎丘奠
吳西門峩然如香樓金道自下方而踢鏘丹霞白雲於

蓮宮之內會之日和氣滿谷陽春逼人嵒煙掃除肅若
有待余與夫不亂行於鷗鳥者銜流霞之盃而羣嬉乎
其中笑向碧潭與松石道舊兕觥既發賓主醉止狂歌
送酒坐者皆和吳謳數奏雲去日沒梵天月白萬里如
練松陰依依狀若留客于斯時也撫雲山為我輩視竹
帛如草芥頹然樂極衆慮皆遣於是奮髯屢舞而歎今
夕何夕同者八人醉罷皆賦以為此山故事

冬夜裴貞外薛侍御置酒讌集序

并詩

二公以大司馬之命領浙水東西十有三州之政相
與周爰咨度乎均邪賦者三月矣當割而遊刃無間
臨機而捨拔則獲由是在簿領之際無江海而閒冬
十月辛未徵會于此堂醺朋友故舊也賢豪畢萃升
降有序縫衣淺帶十有五人聲同故窮達不間意得
而鄙怯皆遣肴芳酒濃夜寂琴暢慷慨言志駱驛舉
白盱衡抵掌啞啞大笑三爵耳熱萬念如洗不復計
名身之親疎憂患之去來也况他累乎既醉余以箸

擊唾壺扣商而歌之其詞曰簿書日盈凡知君傲頃
齧飲和自忘渴况以初筵招道契跡自親誰謂列宿
遙何用結同心綠琴復長瓢日月若走馬炎涼催斗
杓一年解頤笑幾日如今宵奉君千金壽莫使歲寒
凋是日也禮成於易歡生於同滯憤積慘誓掃湯沃
方今溟海始波世屯未康二公克壯其猷以立事為
已任行當自至青雲之上不復與適莽蒼者羣矣吾
儕浮沉其間與風水俱他日或潛泉戾天一離一合

雲動雨散然後知今日樽酒未易再得將子無金玉其音姑偕賦以卒貺

送宇文協律赴西江序

復周正之年天子以潤州刺史張公休為豫章太守豫章之人既庶且富部從事縣大夫缺而不補先以檄徵協律於會稽時人皆賀豫章之得賢協律之遭遇君子則曰夫子刃之餘地不啻切玉剗小鮮而用其鉛無乃不可乎夫子曰不然蓋其不患秩卑而患已素飧不患

國士之不我遇患遇之而不答苟有用我者吾其為執
射乎於是舉帆西陵是日于邁然後知大丈夫之感義
而不私其身也于役長路江臯暮春沉吟泰山悽愴鏡
水豈不知今日斗酒明日不共顧懷安敗名無勇也怨
別傷遠非丈夫也苟將申其道而成其務則萬里咫尺
少別何有二三子其詠歌之以代雜珮

送賀若貞外巡按畢歸朝序

今年春上以富人侯為丞相百揆時叙九州賦錯方欲

不以欲咈人不以私棄公時止則止時行則行弱用之
心也仁矣哉與夫捨龜觀頤自盛以橐者異矣方今主
上用文思柔遠魏邴謀謨唯賢是渴想見厖眉大冠俯
儻於朝廷與公卿大夫言三代故事出入金馬石渠之
署國人孰不宜之今之史臣樂安蔣鎮博陵崔儒頃與
弱用同以德進儻與夫二君子道舊必話鄙夫疲於郡
齋之狀勿使不知我者謂我不思若夫抒今日秦吳之
別斗酒之外詩而已矣

送崔貞外還鄂州序

貞外曳朱組擁使節將鄂州牧御史中丞吳公之命方舟如吳祗役歲事肆觀伯姊展歡申悲浹辰而還飲水恪慎夙夜匪懈孝悌友恭形於容止追攀者觀禮於公見公之仁繫公之先世德與位偕由王父以下一門三太子保傅二御史大夫一宰相四二千石家之範可刑於國今則兄掌冬官弟列郎署閨門怡怡花萼相鮮欲辭必復之榮朝廷其肯捨諸永言夙昔將繼舊好惠而

顧我其敢不以久要為答雖嘉肴充几筵旨酒盈樽罍
祇攬別緒不足慰瞻望不及之歎故可以於此乎言詩

送朱侍御赴上都序

予以才茂經明鄉黨稱仁起褐衣四五年起參夏口軍
事同時諸生有未登賢能之書者公以惠文冠出入殿
中蘭臺其以文章干祿何啻如拾芥吳中賢士大夫由
是益勸今復戒鞅而西言赴所從昔陸士衡入洛張華
如舊相識之子之文章粲然有昔賢風彩彼茂先之徒

曩子之尉于是邦也傲其跡而峻其政能使網不紊吏
不欺夫跡傲則合不苟政峻則物忤故績未書也而謗
及之臧倉之徒得騁其媒孽子於是竟謫為南巴尉而
吾子直為已任慍不見色於其曾臆未嘗帶芥會同譴
有叩闈者天子命憲府雜鞫且廷辨其濫故有後命俾
除館豫章俟條奏也是月也刺船吳門將涉江而西夫
行止者時得喪者機飛不搏不高矢不激不遠何用知
南巴之不為大來之機括乎由圖南而致九萬吾唯子

之望但春水方生孤舟鳥逝青山芳草奈遠別何同乎
道者盍偕賦詩以貺吾子

送王判官赴福州序

松梓梗柟茂於深山不能逃匠石之顧賢士君子晦其
言跡不能使人不已知其勢然也之子言忠信行篤敬
以文雅麗則括而羽之而世皆觀顧我獨儉德吾固知
長風六翮必有時而去及御史大夫李公之命介也辟
書四下果以嗣宗為首歲二月載驥四駝脂車而東閩

中者左溟海右百越嶺外峭峻風俗剽悍歲比飢饉民
方札瘥非威非懷莫可綏也議者其謂君匡戎幕以義
佐師律以禮報國士以直導罷民以德使安危懸於指
掌勝負決於談笑則咨謀之道弘矣豈椎髻殊俗覆車
畏途足為志士之怵惕哉凡我出祖者亦既偕賦

送薛處士業遊廬山序

薛侯敦於詩固於學敏於行時然後言言而寡尤口弗
言祿祿亦不及識其真者以為永歎而薛侯居之澹如

君子哉若人也方以城市鄙於丘壑倦遊不如嘉遯是
月也拂纓上之塵西遊廬山山上有峯頂大林下有東
林西林化成遺愛六寺惠遠道生二公昔常眷戀於斯
焉履痕屐齒遍滿崖谷神期肸蠁恒若對面之子之往
獲心契矣苟藏器於身時行則行大之將來隱顯一致
彼安貞者其或為利涉之樞機乎趙補闕驛王侍御定
張評事有畧各以文為貺記行邁之所以然余亦持片
言用代疎麻瑤華之贈

毘陵集卷十四

欽定四庫全書
叢要卷一萬三千七百三十

集部

毘陵集卷十五

唐 獨孤及 撰

序中十五首

送韋貞外充副元帥判官之東都序

送孫侍御赴鳳翔幕府序

清明日司封元貞外宅登臺讌集序

送澤州李使君兼侍御史充澤潞節度副使赴

本道序

送兵部梁郎中奏事畢還幕府序

送成都成少尹赴蜀序

送吏部杜郎中兵部楊郎中入蜀序

送商州鄭司馬之任序

送洪州李別駕還任序

送韋司直還福州序

送潁州李使君赴任序

送屯田李貞外充宣慰判官赴河北序

送歸中丞使新羅弔祭冊立序

送渭南劉少府執經赴東都觀省序

送餘杭薛太守入朝序

序

送韋貞外充副元帥判官之東都序

太尉臨淮王之秉旄淮沂也天子命公為介洎臨淮薨而相國太原公繼授兵符盡護東夏諸將亦表公參成

周軍事如初命故事登拔垣者不驅傳居諫臣者不就
辟將使其能必易其秩故自左補闕為尚書郎元年仲
春始以使節赴洛陽經大盜虔劉之餘頑民雖遷汙俗
未返三軍之心注於帥帥之耳目屬於參佐以公貞諒
文敏能恤大事且成宣之後也故以部從事咨焉夫民
殘則訛訛則流禁流莫若以德兵不戢則翫翫則暴禁
暴莫若以信建信與德以為幕中之畫繫吾子是冀將
賀不暇別於何有我飲餞者姑以詩代路車乘馬

送孫侍御赴鳳翔幕府序

右扶風之地跨枕龍蜀扼秦西門帝命司徒為唐方叔
開府之日搜賢自貳於是孫侯以監察御史領司徒掾
夫子卿族也用文學纘緒而弟兄皆材伯曰宿以秋官
郎辟丞相府仲曰絳拾遺君前及余為寮夫子則以貞
幹肅恪之能入主方書出佐戎政花萼灼於三臺時人
榮之二月丙午乘傳詣部人謂扶風於是乎有三幸獲
白額而南山有採藜藿者一幸也先是司徒於南
山擒賊帥高玉今夫

操兵者如虎而司徒仁而愛人二幸也其府君則賢其幕府多士而孫侯懿之以文德三幸也恪於德以臨事度其義以從政力於忠以成績吾子勉之其蔑不濟矣士為知己者用豈干榮乎請居者歌之持貺行邁

清明日司封元貟外宅登臺讌集序

可以排天下細故使憂患不作莫聖於酒况與同志者共之復遇司烜出火句芒宣氣天地氤氳熙我以春乎是日也卉木羅其庭除嘉旨充於樽俎言必遺累笑必

造適故談話不及朝市跡無町畦事不機括故和樂不
待笙磬主人有才子四人侍酌於前臺下有南山倚庭
碧草芊芊溝塍圃畦如龍鱗龜甲芳樹繡布白花雪下
於是一觴解顏再觴解憂三觴忘形而傲隨之商絃數
奏牆陰移而坐客醉手持濁醪笑向朗月夫以世道之
多故年歲之不吾與也若憂患歡樂衆寡之不侔苟來
者猶可追無亦顧隙間之駒以樽酒買笑余敢惜費貽
青春羞凡今日娛莫我若也吾乃今日視薄遊空名如

爭蝸角又何用知接輿伯夷不愚於杜康乎顧謂滿坐
展詩以贈亦命夫四子者志之

送澤州李使君兼侍御史充澤潞陳鄭節度副

使赴本道序

今歲皇帝擇可以守四方之臣分命大司徒涼公作蕃
岐陽平秩西夏涼公季弟曰抱真敬事好學仁勇忠信
凡仁則不偷勇則不撓忠則能力信則人任焉故天子
器之方倚以重鎮使宅高平綏厥有衆董次將之任且

以柱後惠文冠冠之詔下之日軍府胥悅蓋蕭何守關
中舉宗詣軍而涼公荷方名之寄亦以愛弟居東旅于
行間忠之大者夫高平上黨之地當趙魏燕代潞之咽
喉太行恒山為之襟帶公居有專城之任行有亞旅之
職其畧足以固其封疆其惠足以柔其民人勗哉夫子
進吾往也伯弓仲弓執兵之要謹身以肥家自家以刑
國高平之政可以未行而窺矣彼瞻望佇立壯夫恥之
非歌詩莫足以贈

送梁郎中奏事畢歸幕府序

元年夏相國涼公將城汧陽百里二城即戎于境先命從事兵部郎中安平梁公鎮如京師請王命且料民以調兵食五月甲戌至自雍危冠上前手畫地圖以兵機軍儲屈指條奏上甚悅事下三府六月庚戌以璽書還雍改轍而西既稅駕於是追送者皆賦美使臣專對以直而君遣使臣以禮詩之所由作也公嘗以郎官宰昭應昭應之賦均人和參事相府相府穆穆今元帥七萃

之士萬計以王命伐不庭公章甫其冠縵胡其纓咨諫
乎轅門討軍實以輯戎政票衛之制勝營平之威謀子
姑佐之固亦整軍經武將王室是獎豈載驥四駱皇華
原隰之謂秋晚筋勁隴闞雪下企予望吾子以班固之
筆札銘崆峒而還悠悠我思章句以贈之

送成都成少尹赴蜀序

歲次乙巳定襄郡王英乂出鎮庸蜀謀亞尹僉曰左司
郎成公可溫良而文貞固能幹力足以參大畧弼成務

既條奏詔曰俞往公朝受命而夕撰日卜十一月癸巳出車吉尚書諸曹郎四十有二人歎軒騎將遠故相與載籩豆醕犧羊鱠鯈脩飲餞于肅明觀以為好飲中客有賦蜀道難者公曰士感遇則忘軀臣受命則忘家姑務忠信夷險一致患已不稱于位於行邁乎何有言訖抗手建節即路且以紛帨刀礪侍輕軒而西凡強學以脩業積行以取位赴知已不為名適四方不違親卿大夫之孝也吾子其無忘可移之忠將咨度是務使岷

峨其乂苛慝不作天聽自民誰謂蜀遠別細故也豈帶
芥乎凡今會同非詩無以導居者之志

送吏部杜郎中兵部楊郎中入蜀序

二公罷東西曹草奏啓事之劇而參軍西南時人或譏
朝廷易其大而難其細及以為不然方當天子命將帥
以守四方丞相秉鉞為唐南仲擇佐命介宜先才者事
孰大焉彼採薇出車以遣役勞勤我則異於是受王命
者不言勤赴知已者不愴離今日斗酒姑展交好遂以

道吾四方之志亦使滿坐歌二公乎

送商州鄭司馬之任序

往歲司馬宰湖而湖人安輯大駕東狩之往復也供帳職辨天子以為能故寵之以兩綬勞勤也今茲佐商增秩也人謂使人任器之道當處司馬以劇而觀其利用司馬曰與其徇名以利人寧勤身以安親况佐郡之逸乎於是五彩其衣是日南邁流火戒節寒蟬嘹唳曉闢白雲片片秋色二三子之感時傷離者斯可以言詩矣

送洪州李別駕還任序

別駕已嘗宰三縣佐四郡未始不以廉直為已任亦未始以廉直銜已名仕有餘力則寄傲於琴趣遠是以曲高意精是以聲全得於心而形於手故非外獎所及當其操絃如操政焉時人知其琴不知其政善而無伐光而不耀故也今也來斯上台解榻卿大夫士從之如不及時因觀操缦之妙可以見從政之道是行也吾予其懋脩乃德恪敬爾位夫亦將抑與不暇求於何有唯湯

湯郢音明日將遠廬峯溢水大江間之風景可同而聽不可共由是衆君子賦詩以壯別且曰備折楊皇華之韻用抒他年之相思

送韋司直還福州序

遠別非難行路難行路非難相逢難始者與吾子會于撫以吾一日長乎子子嘗敦弟兄之好而不吾先自雲搖雨散凡四悲秋而一會面亦既道舊別又繼之斯可以愴矣然君子患德之不逮不患人不我知吾子克慎

厥身以荷先大夫之覆露貴然將命為邦司直被服文
行而鏹礪之揚其家聲吾唯子之望豈行邁與聚散足
貽志士之欣戚乎是別也祗以歌詠貺吾子而已

送潁州李使君赴任序

公之為潁州也朝廷以不失人為明潁人以得父母為
幸公獨以去色養為戚故執事者難之其為公謀者則
曰受命忘家公也愛親讓祿私也君子不以私廢公不
以孝棄忠况國家方親親賢賢而當潁人僕師長之日

可以此時急聞禮而緩君命乎公曰諾然後明日朱兩
轓而東竭力致身之誠於是乎全矣方當輯寧波人懦
而袴之宜其大王事而小行役豈徂暑之熱遠道之思
與前期之難足攬胷臆賦詩勗別予以持贈

送屯田李貞外充宣慰判官赴河北序

秦吳燕宋之別昔人所愴若君子以令德佐王之使臣
將命以適四方當用文教柔遠威懷示德則其舉也可
以悅其愴也可以遺况吾子家本全趙倦遊一紀駟馬

以過故鄉足展南枝北風之思買臣歸越相如還邛古
今相望是可同轍明日渡滹沱涉桑乾布王澤覽風俗
之暇為我問藪臺崩丘厥狀何似平原樂毅故事存否
歸而揚榷用廣異聞夫道別離者緣情而已

送歸中丞使新羅弔祭冊立序

儒家流鮮肯冠獮旁冠者天子以公身衣儒服力儒行
行之脩可移於官學之精可專對四方是故任公執法
之位且使操節以濟大海頌我王度于大荒之外夫新

羅嗣王以喪訃且請命于我我則歸贈繼好以策命命之實懷遠示德禮之大者夫亦將弘宣王風誕敷微言使雞林塞外一變可至齊魯不然歸公何以不陋九夷之行也蓋行於忠信者無險易拘於王程者無近遠故公受詔之日則遺其身視涉海如蹈陸謂窮髮猶跬步豈鯨怒鼇抃足戒行李凡以詩祝別姑美遣使臣之盛云爾

送渭南劉少府執經赴東都觀省序

彼徇名者遭時多故乘地高勢罕不爭先鞭而務飛速
以誇當代獨吾子以文行裕盡思不出其位奉贏金之
所遺羞地芥而不捨其初以筮仕也典校祕書祕書之
職脩尉于渭南渭南無粧政歲二月以紛悅觴燧歸覲
于洛白華之戀也和氣用事春物滿眼之子于征五綵
其服想成臯花合穀洛水大是吾子拜嘉慶問清高之
日歟夫克家而家肥策名而名彰居官而官辦孝之大
者則貂蟬羔鴈在子外府姑務遠圖何嗟少別到洛陽

為我寄聲謝鳴臯故山杼離如之何詩以贈遠

送餘杭薛太守入朝序

有大道者遺小成之迹抱宏畧者非曲士所見公嘗以匪躬之故三入承明時議用舟楫期公者七載矣而猶建隼河墉洗幘江島興貝錦之歎詠跋胡之詩豈不以名至盛德至廣而廈材多節夷道若類乎今天子受宣室之釐忽思賈誼以謗書之篋先示樂羊且搜玄珠俾詣丹闕則巨鱗方縱未可料也雖欲抱黃老之術與赤

松子遊公器所歸難乎免於珪組矣夏五月弭棹睢渙
脂車而西火雲成峯郊草如織誰謂秦遠跂予望之有
以見升赤霄捧白日在此行也謂攀四牡者各賦南山
有臺之四章取樂只君子德音是茂以為志云爾

毘陵集卷十五

欽定四庫全書叢要卷一萬三千七百三十一

集部

毘陵集卷十六

唐 獨孤及 撰

序下 十四首

崔中丞城南池送徐侍郎還京序

送蔣貞外奏事畢還揚州序

揚州崔行軍水亭泛舟望月醺集賦詩序

并詩

送武康顏明府之郢州序

送六合林明府赴選序

送崔詹事中丞赴上都序

送李副使充賀正使赴上都序

送孟評事赴上都序

送柳貞外赴上都序

送崔貞外還鄂州序

送朱侍御赴上都序

送少微上人赴天台國清寺序

送陳贊府兼應辟赴京序

送司華自陳留移華陰赴任序

序

崔中丞城南池送徐侍郎還京序

侍郎昔為河南督郵河陽令其解龜也東人思其遺美
今出入夷險歷二十載而一來廳樹未老佐吏半在公
位望章綬輝光城邑觀者榮之而東都主人亦以籩豆
醕草徵會脩好之不暇凡萃止十有五日而去去之日

主人歎瞻佇之莫及也故又釀酒于此池池上有雙綵
艤與竹齋對布賓主位于樽之左右而蘭臺金闈建禮
承明之英十有八人序列其次池外有闕塞雙嶺遙作
外戶嵩高逶迤數峯當窓伊洛春樹若刺繡布錦仙桃
火燃顧我則笑於是遊眺之不足則舉白以相勸而狂
歌送之唱棹鳴桹簫鼓陳乎其間醉中疑三江五湖去
人不遠謂千慮萬事無非妄作况少別可以興愴乎但
駟馬行塵明日將遠臨流無賦謂樽酒何宜歌而詩之

且以見追攀者之志

送蔣貟外奏事畢還揚州序

揚州牧趙國崔公使其部從事侍御史吳興蔣冕如京
師條奏官府之廢置歲月之要會其來也吳楚之衆君
子酒而詩之而薛水部弁李司直翰雙為之序以冠篇
首既將命趙公拜左僕射蔣侯加尚書郎之位其還也
之予日執書卷以言於朝曰始者與數賢別賴斯文故
常若在眼今幸而遷秩行車在門明旦離羣想今日之

會亦猶於此而思彼也非置詩袖中人謂我何然後西人之舊者皆賦韻道別而鄙夫和之詩大畧蓋美蔣侯以才智任職有周爰咨諫之用而將事不墜專對不辱能一其心以佐大府之政政靡小大唯公是謀謀之臧歸于府不知我者則謂我專趙公所以有成瑨坐嘯之論而無慙示樂羊謗書之篋而不疑斯可謂之明矣今也于歸晝曳兩綬然濁涇素瀧春水始生秦原青青諸草皆秀可共樂也而又別焉凡我同僚是以有瞻望不

及之歎故送遠之志悉形於文

揚州崔行軍水亭泛舟望月醺集賦詩序

并詩

言同者無約束而信心同者未謳浪而樂聲應情至則不俟外獎况遺言之言造適之笑與盃中物池上月風中絃五者合以貺余歡其可勝既乎于時衆君子棲公翰林如翔鳥之得茂樹也至是登于仙舟泳彼新流掇芳翫奇以永今日日不足故用夜漏繼之羽觴未及數覆銀河橫而金波上樂作神王百憂如失而絃繁管清悲歡

交乎其間則高歌爭進或道舊以泣酒酣意真樂極感至故也當斯時視身後之竹書鼎銘猶稀米芻狗也况細故乎二三子醉猶能賦且酌且詠余屬而和之以繼善歌其詩云明月借秋興流光在此池山公顧我厚酬酌稱未疲勿謂嘉會易但憂離別隨飽君醉中德敢使松心移

送武康顏明府之鄂州序

多故已來干祿者進必欲速大抵悉棄夷道而趣捷逕

顏子獨曳儒服非其知已之命不苟合非稽古力所致
不妄動今其來斯也不以賄不以名不以遊眺挾策讀
書藝成而去君子哉若人耶將以特舟片帆泝洄於大
江秋濤之中涉彭蠡歷西塞浮于潛踰于沔吾子安於
忠信亦宜安於風波况滔滔江漢茫茫禹跡乎於此
乘渚返顧齊吳榜以擊汰其聲可想司馬子長浮沅湘
窺九疑亦此路也足以覽古乘興窮極視聽行將搜異
不暇懼於何有凡今賦詩以抒居者之思且用勗吾子

四方之志云爾

送六合林明府赴選序

今之為邑者祇事趣辦而已矣之子獨以公廉不苟聞於朝夫公則能力廉則不苟不苟則無害六合之人飽是三德故家肥人讓而名隨之矣其黜陟幽明之日首冠賢能之選也宜哉上方勤恤民隱求良吏如不及之予令問將與時偕行當見函洛春物迎馬首於千里之外勿謂蕪城衰草足愴遠別二三子何以持贈其歌詩

乎

送崔詹事中丞赴上都序

初公由尚書郎出佐蜀郡無何熊軾暢轂專席而坐休
績布於巴漢天子器之時人謂公逸足駿駿視公卿猶
步武耳既而剖符驅傳出入吳楚專五城佐二府府罷
身退復藏於密出處之道歷二十載而未光知公者不
堪其歎公未始屑於冒暭貞直廉讓之德內充故也夫
貞則專直則固廉則不競讓則後時故其寵不及而名

益茂也宜哉今上方厲精熙載用官人安民為急百工以釐不至者知罪故公朝責然伏軾入關時然後行動而不格在是役也銷憂者莫若酒酒中樂酣可以道千里之意者莫若文羣賢詩之以送遠蓋古人雜佩以贈之之流也

送李副使充賀正使赴上都序

之子領祕書著作于是邦參我軍事事必肅謀必忠居處必恭三年矣而身無擇行職無粋政政之和非吾子

昌賴今茲將東諸侯之命朝于京師稱壽之儀舉專對
之才達是行也將為度材者所得豈復顧池中乎正月
元日和氣資始大行設九賓於蓬萊前殿皇帝輦出百
辟奉賀公將以此時捧章奏於雲陛之下得觀虞舜之
九成簫韶塗山之萬國玉帛况惟仲氏典司宸翰崇棣
之華交映於朝斯可謂之榮矣懋脩乃職尚慎行邁勉
從欒伯之戒將復臧孫之烈至如遵大路之歎不足為
吾子設矣吾嘗同寮且士龍之執也江樓醉別何用覩

遠以其章句當佩玉瓊琚乎

送孟評事赴上都序

孟子以鄉舉秀才射策甲科二十年矣同時中楊葉者
今或蔚為六官亞卿或形襜虎符秩二千石而孟子猶
羸馬青袍客江潭間遇與不遇何其寥寥也然君子不
患貧患業不修不患位下患道不行孟子言忠信行篤
敬好學工文令名藹然今茲入闕有司之喜也諸公展
相遇之禮其肯不以推之輓之為已任見三月四月之

交澧灞之間王睢飛鳴草木暢茂是吾子彈冠之時也

二三子不可以不賦

送柳貞外赴上都序

初弱用之拜也吏者隱者相見皆賀曰朝廷搜賢不遺丘壑中人則搢紳之賢者日至矣未有賢人至而太平不興者而弱用獨以哀疾行邁為憂諫議大夫昌黎韓幼深貽弱用書曰天子之命知已之遇其可易乎由是不敢言病即日戒路夫君子之道進不苟容退不懷安

其肯捨吾子乎將子獻詩著論特備風雅以宣上德抒
下情為已任勿獨誇吳趨閭門之廢興辯尊羹羊酪之
優劣而已急賢之日何患人不已知凡今贈別皆吳士
也

送少微上人之天台國清寺序

或問上人曰文者所以足言也言說將忘文字性離示
入此徒無乃累一相乎答曰稱示入者過矣以習氣未
之泯也率性脩道庶幾因言遣言故欲罷之而未能耳

時人謂上人為知言知道歲次乙卯自京持鉢而來給事中天水趙公涓賦詩抒別卿大夫以下屬而和者二十七章既而飛錫濟江休于晉陵又東至于姑蘇將涉震澤踰會稽上天台至國清上方而止趣靜境者不料遠近登漸門者不計歲月則上人還斯詎可知也上人之文章可得而聞也諸公將議遠別得不以斯文為贈乎

送陳贊府兼應辟赴京序

初公讀梁竦傳始慨然薄遊恥揭其公器退而耕於楚
縣知言者以為子真吳都禦寇圃田卜商西河與公道
雖不同其操一也羿工於中微拙於使人無已譽固知
大名之下天爵難讓十二載冬十月果以公才徵龍泉
自惜斃隱牛斗之次美玉無脰竟為秦人所得且晉以
梁山召伯宗漢以明堂延申公尊德問禮於斯為盛况
朝廷頓八紘久矣頃未儒服立於魯人之門者公祇命
台鉉將濯纓而孤矣當貞女不字十年反常及大翼怒

飛知一日幾萬問離羣何贈請賓賦車乘主人賦南有
嘉魚以代霖雨之頌

送司華自陳留移華陰赴任序

去年春公自京兆北部尉謫掾陳留議者或歎公大才
未光直道而黜君子則曰否患德不立不患遇坎始用
舉至是雖速謗何傷有才與時不遠而復其明年春肆
大眚冢宰量殿最厚薄以令聞遷公于華陰然後知朝
廷之錄用也華陰者左崤函右雍州潼津鍾池綴於分

野長河太華為之襟帶甸近所以難其選地雄所以寵
其秩公將以利器刃物清機臨人吾見岑公孝不得專
美於南陽大火初落昊天欲高遠山雲開歸路秋色請
各抒別操使行者得歌而咏之

毘陵集卷十六

謹案卷十四第五頁前五行今四表文明八紂同
治原本同治訛屢頓今改

第七頁前七行及今而三耳原本耳訛年今改

第十二頁前五行方今內有夔龍臯禹原本禹訛

伊今改


第十五頁前六行饑者如得食寒者如得續原本
下如字脫今增

卷十五第四頁前七行無亦顧隙間之駒原本駒

記駟今改

第十頁前七行是故任公執法之位原本任公二字倒今改

卷十六第五頁後五行其默陟幽明之日首冠賢能之選也宜哉原本此句之首多宜字今刪第九頁後四行鄉黨稱仁原本稱訛稿今改



總校官庶吉士臣侍朝

校對官助教臣吳省蘭

謄錄監生臣李維裕